

milieu desquelles estoient quelques petits cloux d'argent : & l'on le semblable auoir esté fait par vn Roy de France. Dionysius le tyran fit vser les Syracusans de monnoyes d'estain : & Lycurgus les Lacedemoniens, de monnoyes de fer, comme dirons plus amplement à la fin de ce chapitre : auquel ie veux parler principalement, & en particulier d'un chacun des susdits trois metaux, que nous disons estre la principale matiere des medalles : apres auoir dit ce mot, que les anciens n'eussent sceu choisir chose plus propre à leur intention, que le metal, soit qu'ils eussent regardé seulement à perpetuer leur memoire, par la facture d'icelles medalles, comme aucuns veulent : soit qu'ils le feissent pour vsage, achapt, vendition, &c. Car soit pour conseruation de la memoire, soit pour courir par le monde entre les nations, le metal elaboré industriusement, & reduit en forme & figure aisee, conuenable & decence, est tres-propre, ne fust-ce que pour sa longue duree, & resistance contre la corruption, & autres iniures du temps, qui deuore & consume toutes choses : ausquelles sont sujettes presque toutes autres matieres.

## Du Cuiure.

Disons donc du Cuiure, lequel est venu premierement en vsage que l'argent ny l'or, & a esté tousiours estimé le vray conseruateur de toute memoire, & depositaire de tout ce qu'on desiroit plus longuement durer. Ce que tesmoignent, outre les medalles, les statues plus communément faites à Rome de ce metal, & singulierement les tables d'airain, esquelles les Romains ont engraué leurs loix, decrets & ordonnances, desirans qu'icelles fussent de bien longue duree. Aux anciens le cuiure a eu le premier lieu & autorité es choses sacrees : dont es temples les vaisseaux & autres instruments estoient de cuiure. On buoit anciennement par honneur, en cuiure : les armures des plus grands seigneurs estoient de cuiure, tesmoin le poëte Homere : somme, du commencement il estoit en grand honneur & vsage. Pausanias aux Arcadiques escrit que Ræcus & Theodorus Samiens furent les premiers qui trouuerent la maniere de fondre le cuiure. Il fut frappé & battu à Rome, le premier de tous metaux : & mesme bien long temps auant que Rome fut edifiée, regnant Ianus avec Saturne en Italie, auoit ja esté frappé & marqué avec l'effigie & double visage d'iceluy Ianus d'un costé, & la prouë d'une nauire de l'autre costé. Seruius Tullius sixieme Roy des Romains (comme dit Plin) fut le premier qui luy mit la marque de la brebis, & du bœuf : & de tel bestail, qui est dit en Latin *pecus*, est venu le nom de Pe-

## Pecune.